

四庫全書

集部

欽定四庫全書

集部

靜思集卷八

十五

詳校官檢討臣德生

中書臣劉源溥覆勘

總校官降調編修臣倉聖脉

校對官中書臣潘奕萬

謄錄監生臣開益

欽定四庫全書

靜思集卷八

元 郭鈺 撰

七言律

晚眺

眼看淮海待澄清，骨滿邊城苦戰爭。  
老大不堪思往事，飢寒久已厭吾生。  
煙深薜荔樓烏急，風響蒹葭落雁鳴。  
惆悵故人書不到，別來十載最關情。

去年中秋與郭怡飲舍弟處酒半以事散去今

年余飲桐江上乃以羣不逞又走渡東岼德  
之不建民之無援哀哉

玉簫聲斷彩雲收扶醉倉皇問去舟魑魅瞰人成往事  
姮娥送客變新愁蘆花掩映漁燈暗桂樹荒涼茅屋秋  
八月使槎何處在銀河天曙淡悠悠

送從姪淳

路窮淮汴草離離志士空嗟歲月馳靚面人心山萬疊  
緣愁客鬢雪千絲風悲洛浦海鳧至月冷漢宮金狄移

從古戰危頻，易將君王見事獨何遲。

晚秋鰲溪宴集

菊花香滿酒如傾，不謂艱危有笑聲。  
驚座令嚴觥錄事，揮毫氣壓楮先生。  
虛嵐紫翠籠秋色，落木紅黃透晚晴。  
却憶桃源舊時路，漁郎重到不勝情。

寄東周說書

聞君進講東宮日，衣染天香從早朝。  
鶴舞層霄燕闕近，馬嘶歸路楚山遙。  
貞元朝士多相憶，少室山人早見招。



我亦疎頑人共棄一蓑長願混漁樵

雪中員米晚歸傷題七字句因東李尚文少府  
蕭索風煙暗五陵羣黎愁苦復誰憑早年識字知何用  
垂老為農病未能員米晚歸沙上雪拾薪寒煮澗中冰  
不眠永夜瞻牛斗光怪猶疑劍氣騰

早春試筆

臘雪留寒壓草廬陽春攜暖散天衢喜聞諸將黃金印  
共捧中朝赤伏符詩句且題新甲子酒盃不愧舊屠蘇

洗兵雨至應須早半畝瓜田得自鉏

宴酬王志元

前月中旬得素書書中問我近何如浮沈漸與鄉隣狎  
貧病多令故舊疎杖外飛花春水慢樽前啼鳥午窓虛  
詩成昨夜空愁絕夢到君家水竹居

村居

薜蘿雨靜覆深階村逕陰成愜素懷  
鷲敵高風疑不動鴨分歸路整相排  
抵愁得策將詩改療癖多方與俗諧

四五隣家農務早時能送酒到山齋

寒食日紀懷

不到東園滿數旬萬條烟柳翠光勻雨中春嬾鶯如我  
花外晚愁鶻逼人近有詩名真忝竊老于世事每因循  
煮芹炊黍作寒食破甑清晨洗宿塵

貽劉伯敏

去年余嘗為惡詩貼壁間一日盡失  
既而從弟鐸過伯敏乃知為伯敏取

去相與一笑寧知其非  
燕石歟故詩中及之

江海歸來少夢思論文猶恨識君遲雪鴻竟去空留迹



天馬長鳴不受羈  
每日想君池上酌  
有時和我壁間詩  
滿林秋色風烟晚  
甚欲相過未有期

聞龍西雨自閩海間道抵家患目疾缺於展覲

先寄此詩

萬里征帆海上回  
畏途行盡始驚猜  
入門兒女牽衣笑  
問事親朋載酒來  
書有浮沈誰與送  
眼無青白故難開  
蕭蘭晚歲俱凋瘁  
佳句惟應到野梅

和劉淵見寄

半畝衣田近故侯，鬢絲霜滿不禁秋。  
愁期尊酒常先到，貧待鈞金不易求。  
天上龍光纏寶劍，人間蜃氣結飛樓。  
哀時况復多離別，雙泪惟添楚水流。

和曹文濟寄楊和吉韻

盡傾東海成春雨，隣曲過從阻萬山。  
無限客愁添白髮，况無人事劇黃闕。  
瑶臺花落題詩少，金錯囊空得酒難。  
白日逝波真可惜，一庭芳草閉門閒。

和歐陽奎自洪都見寄

愁來不敢縱高歌對酒其如白髮何十載干戈豪氣少  
一編史傳是非多未能傳箭收青海且復還山臥紫蘿  
氣轉洪鈞妖祲息終看王化被江沱

和周宗瑾寄彭南暝進士韻

射獵歸來箭血乾門前車馬簇金鞍交游有道多三益  
伯仲能文見二難日共飛觴詩卷滿夜歸草檄燭花殘  
愁余江上空相憶水激寒沙不可搏

寄宋竹坡

宋公池上千竿竹六月脩脩秋滿林漏日遊絲懸落絮  
繞渠流水浴鳴禽江湖十載皆陳迹風雨五更收壯心  
汲水細澆籬下菊花時容我一登臨

和酬羅達則

聞君釀酒滿春甕淨洗深盃候客過聽雨山樓燒燭短  
掃雲石壁寫詩多門生傳草當先到畸客飄蓬不共哦  
稍待秋高涼月夜相從細問法如何

和劉伯貞見寄

斯文同味似同宗  
長日思君意萬重  
客館雨來秋種菊  
故山雲去晚看松  
流傳近日多詩句  
邂逅何時共酒鍾  
如此交遊能幾輩  
白鷗結社願相從

和羅習之見寄因東劉淵二首

昨日尋君恨不逢  
離愁散入暮烟中  
古陂淨瀉秋千頃  
歸路斜分月半弓  
年少向人偏骯髒  
時危臨事始疏通  
論心長欲書燈共  
無奈君西我復東

中年離別倍依依  
何事懽娛與願違  
日落羣鴉煙外急

山空獨鶴月中歸，干戈滿地荒衣。圃蓑笠殘年擁釣磯。  
問訊劉郎風雪冷，誰將金縷織成衣。

二月初晴題淦西居人樓壁

老去才名久，退潛樓前晴景逐。人添雲連野樹深，藏逕  
風捲溪花亂。入簾遠信忽傳，閩徼外閒愁盡。挂楚山尖  
春光流轉，曾相識，獨怪經年雪滿髯。

三月十三日夜宿淦西山絕頂

夜登絕頂幾千尺，臨曉始知歸路遙。水滿大江舟窅窅。

塵飛客路馬蕭蕭  
山河勢窄如懸網  
雲漢光低不作橋  
十二年間多少恨  
春來不共凍痕消

懷羅達則

溪山杖屨每相違  
况復經年去不歸  
移席花間春雨至  
倚樓江上暮雲飛  
鄉書到手無悲喜  
世事闕心有是非  
池上祇今新綠滿  
待君同製芰荷衣

寄劉伯貞

山中長日倦題詩  
偶望鄉闕有所思  
飛雨忽隨龍去遠

閒雲獨伴鶴歸遲  
度溪風剪松花落  
繞籬分野蔓垂  
遙想西樓今夜月  
玉人正是醉吟時

六月初十日客館披涼寄伯剛文學蓋傷於處者也

君王無復問南州  
賤子何能戀敝裘  
齒齒風清長日度  
梧桐雨冷晚秋愁  
一窮到骨更何有  
萬事傷心不自由  
避地惟應蓬島去  
羽輪人世向誰投

寄胡湜伯清兼柬周子諒



積雨初晴綠漲溪  
溪花飛舞屋東西  
烏銜朱果珊瑚碎  
竹放青梢翡翠迷  
池上酒盃無俗客  
壁間詩句有新題  
結廬不用雲深處  
門閉惟聞過馬嘶

贈賣卜雁明信

憶自成都失老巖  
一年心事向誰占  
謀身每信黃裳吉  
涉世空嗟白髮添  
太古圖書含變化  
後來象數極窺覘  
聞君講易長無倦  
客散中庭月滿簾

九月兵至桐江館  
人死李文麟以詩相弔故復

和之二首

江水滔滔流恨長  
交親十載頓云亡  
空村煙雨豺狼滿  
老圃風霜松菊荒  
漉酒陶巾猶在手  
招魂楚些惡成章  
論交不使逢知己  
敝帚千金祇自傷

白髮山翁最好文  
昨朝盃酒死生分  
可憐耆舊多新鬼  
未必臣民負聖君  
鶴語謾傳遼海樹  
龍文長想碭山雲  
扶危實藉英雄士  
馬上相期早策勳

對雪懷郭順則

寒壓貂裘曙色微  
水村山郭遠涵暉  
瓊田萬鶴凌風舞  
玉女千花繞座飛  
勲業平淮碑石在  
風流訪戴酒船歸  
想君懷古偏多感  
宥使緇塵浣素衣

旅館懷舊

天涯剪紙賦招魂  
寂寞空齋晝掩門  
春燕同來人事改  
夜燈相對語音存  
松花滿地閒棋局  
薜葉經年上石墩  
豈是老懷多感激  
百年交誼共誰論

題邊少府權詩集

君才浩蕩漲溟波  
燕趙論文俊傑多  
枕上聞鷄先起舞  
花前把酒獨長哦  
漢皇不識神仙尉  
蘇子偶逢春夢婆  
志士百年名節重  
一蓑且復臥煙蘿

暮春順則宅宴集和羅國芳韻

千尺蒼松鏤翠岩  
兩竿初日射晴嵐  
山人結屋深相對  
詞客過門得共談  
酒送餘春盃滿百  
月明歸路影成三  
暫時相賞攄懷抱  
莫訴邊城野戰酣

秋日

江上秋風吹布袍滿林敗葉暮蕭騷雲沈雁信人千里  
雨荅蛩聲客二毛汗馬功名知命薄蠹魚文字漫心勞  
十年辛苦成何事贏得一貧聲價高

哭邊權少府

新渝邊權尉六合兵亂棄官歸去  
年始與余締交甚相親未幾避地

渝上適與館  
人難死焉

往年把酒楚山秋歎息相逢總白頭梅福吳門聞久去  
禰衡江夏為誰留血凝塞壁精靈在氣貫晴虹魑魅愁  
鄉國衣冠轉憔悴招魂何處泪空流

曹居貞先生求挽詩

自述墓志

老子懸車尚黑頭，中堂進士晉風流。  
延年好待桃千樹，觀化深知貉一丘。  
墓碣自題成早計，儒冠不改配前修。  
郎君愛日情如海，春滿觥船任拍浮。

東羅伯英

庚寅辛卯年間余與伯英俱客桐江上時有賓從甚盛自兵亂十四年惟

余伯英重到不能無重感焉

大藥霜髭竟不還，白魚無計滿千仙。  
別離歲月落花雨，歌舞樓臺芳草煙。  
世事榮枯分一日，人生感慨萃中年。

劉郎恨滿玄都觀重到題詩共幾篇

乙巳夏五月茶陵永新兵奄至遂走淦西暑雨

涉旬米薪俱乏旅途苦甚因賦詩示諸同行

白髮遺民真可哀途窮猶望北兵來關河割據將成讖  
將相經綸豈乏材足繭荒山走風雨腹飢深夜吼春雷  
主翁清曉催人發又報烽煙逼楚臺

重題禪寂院

六月兵退重到禪寂見諸人留題  
悉為兵人所去而余與李文麟二

詩獨在因發一笑記昔有寒士殍於途官為  
檢覆件作唱云編身無他故惟腰間有雪詩

三十韻聞者絕倒余其斯人之徒歟  
遂賦一首寄李且以示吾極上人云

詩苦窮人人苦吟偶隨名勝到叢林  
畫龍點眼先飛去詠鳳求毛不用尋  
豪客尚能知李涉奸雄終不棄陳琳  
文章得意無今古讓與籠紗照碧岑

丙午元旦晴而復雨憶諸弟俱留于外情見乎

辭

父老新年卜曉晴桃花春色照岩扃  
洗兵不厭東風雨總闕長瞻北極星  
棠棣有詩空諷詠屠蘇無酒自清醒



揮毫對客書桃板白髮添多眼獨青

寄張九成

不飲酒而  
多符術

山館聞君足自娛賦詩近日與誰俱樹侵釣石斜傾蓋  
雨定游絲小貫珠客主長年存醴酒鬼神清夜捧陰符  
溪邊舊約何時到愁絕天涯一字無

寄朱竹坡

久欲從君借竹看東風又長碧琅玕午陰坐久晴雲落  
夜漏眠遲白露溥韭葉連畦從料理菊花分選共平安

洞簫一曲裁新管石上雙吹翠袖寒

聞郭怡有詩未及見因賦此以寄恨

一襟老淚點蒼苔誰信愁腸日九迴  
豪傑虛名多自誤  
弟兄急難竟誰來橋分溪路桃花落  
門閉山房燕語哀  
禍福情知相倚伏浮雲蔽日幾時開

和宋竹坡見寄

聞君近住崆峒下俗客不來長閉關  
得句徧題青竹上  
寄書曾到白雲間微風欹枕茶煙散  
晴日捲簾花意閒

舊約許尋須候我月明騎鶴過南山

和楊茂才閒居

板橋通逕薜蘿深濃翠浮衣竹十尋啼鳥漸馴時近客  
歸雲不動似知心剪苔盤石移碁局添火香篝續水沈  
賦筆惟應潘岳好恨無尊酒與同斟

丁未人日

誤喜新年七日晴黑光盪日更分明陰陽元自相消長  
中外何能息戰爭高視山河分王氣不知金石載虛名

麴生廢痼交情絕看徧梅花晚獨行

和楊和吉二首

讀書頭白苦無多自判才名易滅磨耆舊凋零霜後木  
世情翻覆雨中荷數家煙火惟聞哭三月鶯花誰復歌  
薜荔繞垣茅屋小綠君開逕日相遇

海棠雨外半含啼病起吟情嬾更題匹馬看花空老大  
還山采藥自幽棲欲尋仙館窺丹鼎曾借漁舟度碧溪  
門卷總非初到日渚蒲汀柳望都迷

三月十六日訪宋竹坡不遇

門巷春陰綠樹遮  
重來不省是君家  
雲封山館半簾雨  
水泛溪流萬片花  
王戴風流成故事  
吳張圖畫動中華  
小童報主須留客  
湯沸銅瓶旋煮茶

和周愷并憶元達詩

元達名浩余同宗又嘗  
同硯席丙午卒于漂水

一望吳山一斷魂  
眼枯雙泪出還吞  
青雲事業終何補  
白首交游不忍言  
舊館空懷風雨夕  
新阡遙隔水雲村  
謝池春草山陽笛  
未卜他生得共論

贈戴醫

舊約尋真海上山相逢長有好容顏  
一池伏火燒丹熟兩袖晴雲采藥還  
坐遣呻吟成笑語久拚名利換清閒  
頂門欲試金針妙白髮青燈我最頑

和周子愷中秋感懷見寄

樽前舊事逐飄風贏得衰年兩鬢蓬  
病骨五更秋氣入佳期千里月光同  
鄉闕高興鱸堪膾江海脩程燕避鴻  
昨夜桂林重對酒看花雙眼霧濛濛

雲屋為龍叔起賦

挂冠歸去雲為屋，又似鴻濛未判初。  
竹送清陰隨杖屨，窓涵微潤入圖書。  
聞鷄疑與仙家近，放雁多令舊客疎。  
何事劃開天宇淨，醉攀明月抱清虛。

客館書懷

曉鏡形容暮不同，控搏人事更匆匆。  
端相舊壘去年燕，斷送殘花昨夜風。  
易播共憐交誼重，依劉寧為旅途窮。  
世情近日皆非舊，始悟相逢是夢中。

春望

戊申年  
間作

飢烏磔磔伴啼鴉，倦倚東風兩鬢華。  
避地每如巢幕燕，論交誰辨酒杯蛇。  
雲遮望眼迷芳草，雨動離愁怨落花。  
懷抱一時何處寫，甕頭春酒不須賒。

荅楊和吉韻

白髮侵尋暮景來，掃除無策覆空盃。  
江山每與愁俱到，風雨不知花盡開。  
往事漫存元祐迹，少年何羨洛陽才。  
惟君於我過從近，稚子朝朝掃綠苔。



郭尊師至安堂

道人極目立蒼茫  
歎息紅塵去路長  
車折秦關投虎口  
馬窺蜀棧戰羊腸  
海天鶴送仙書到  
石洞花分春酒香  
寄語往來名利客  
不如學道至安堂

代贈峽江王巡檢

將軍仗節鎮巴邱  
虎豹深藏山水幽  
草露洲長朝試馬  
柳風波細晚迴舟  
岳飛曾作千夫長  
李廣終期萬戶侯  
且訪南隣讀書客  
論詩說劍自風流

訪友人別墅

陰森萬木曉蒼茫  
路轉山腰問草堂  
池湧慢波萍葉散  
窓涵細雨橘花香  
讀書程度輸年少  
中酒心情厭日長  
公子飄飄才思濶  
何妨高詠伴滄浪

劉潤芳馴雉助祭圖

掃葉秋風宰樹寒  
頓令馴雉識衣冠  
孝心冥感飛相近  
禮數今存留獨看  
人散應同翁仲語  
地靈長羨子孫安  
紅翎翠羽開圖畫  
我亦緣君激肺肝

代贈

詔頒大邑縣符新君領除書第一人聖代祇今更治化  
大賢于此展經綸信臣寬厚恩如父黃霸嚴明政有神  
氣轉洪鈞生意早棠梨花發滿城春

送李子高遊金陵

吳中八絕冠羣材楚楚芳年君又來得酒醉飛鸚鵡盞  
題詩先到鳳凰臺天迴北斗星辰近地盡南郊道路開  
信是皇州春色早好將紅杏倚雲栽

送劉叔亮兵後歸清江

風塵荏苒鬢毛斑鄉夢無時到故山去國每憐王祭老  
攜家今見管寧還松深先隴寒煙外草滿荒庭夕照間  
不用人間多感慨梅花春色破愁顏

送費吉水

五馬遙臨白鷺洲光榮全勝古諸侯滿城秋雨聞絃誦  
夾道春風露冕旒東觀天高鳩鵲並中臺地迴鳳凰遊  
歸朝明日承恩早玉筍催班第一流

己酉元日

往事悠悠不足論  
細看桃板舊題存  
青山樹繞千年屋  
白髮人看五世孫  
側注曉容驚破帽  
屠蘇春色醉深尊  
歸雲更是無心者  
借我長封谷口門

送孔貫道應賢良徵辟就謁孔林

詔下江南選俊良  
君行千里似還鄉  
淮河天近魚龍會  
闕里春回草樹香  
一代又論新禮樂  
千年仍覩舊宮牆  
仲舒三策陳王道  
文獻承家好激昂

和胡濟見寄

雨後溪雲冉冉生夕陽蛛網一絲晴  
山環老屋杉松合水滿平田鶯鴨鳴  
老去客程憑酒力愁邊春色減詩情  
文章伯仲真吾友莫怪兒童不識名

和李士周韻

春雲乘雨午橋陰  
病眼看花負夙心  
漢水盡堪添綠酒  
燕臺何得築黃金  
手攀楊柳曾親種  
路出桃源不易尋  
畢竟知音眼前少  
塵埃三尺暗桐琴

寄李亨衢

君住仙壇歸路遙  
人間塵慮盡冰消  
微風半脫烏紗帽  
明月閒吹紫玉簫  
出水芙蓉鳴翡翠  
繞牆薜荔護芭蕉  
日長應共羅浮客  
時復松花酒一瓢

贈驛吏

筮仕何論占甲科  
獨君於此閱人多  
海舟夜泊藩臣至  
官馬晨嘶天使過  
微祿暫能淹歲月  
好音原不阻關河  
時來得遇憐才者  
早振朝衣上禁坡

題安樂何心淳草堂舊隱

草亭亭上舊曾邀  
窓戶憑高結構牢  
濃翠入簾春雨竹  
亂紅飄席曉風桃  
功名前輩遺鴻爪  
文采諸孫有鳳毛  
萬事目前無所與  
惟應對客醉揮毫

贈金守正

六月松陰坐紫苔  
得書頓使好懷開  
離愁百斛如雲散  
涼意一襟隨雨來  
玉筍天清長在望  
金洲春盡每思回  
高懷又作秋風約  
不限金錢問酒盃



答張九成韻

自信功名骨相寒  
西風長笑倚闌干  
醉劉不用攜長鑊  
盲夏惟應著小冠  
遠寄高吟諧律呂  
何由並駕接和鸞  
楚山歸鳥憐毛羽  
栖息一枝何處安

贈別宋仲觀

梅花江上雪意殘  
獨行遠道何當還  
大江風微五兩靜  
虛館日高雙陸閒  
十載論交傾意氣  
一朝送別凋容顏  
坐歌激烈我何有  
明日射虎歸南山

和酬宋竹坡韻

寄詩問我山中事性嬾家貧一事無  
春甕酒香梅未落  
午窓夢起鳥相呼舊來叔夜交遊絕  
老去文通筆硯枯  
鷗社共盟君未棄何須馳志向伊吾

和酬李潛

世路遭迴暮景移老懷無託廢題詩  
朱顏棄我辭杯滿  
青眼看書下筆竒雨暝茶煙侵竹潤  
春寒香霧出簾遲  
地偏每恨交遊少何日能來慰所思

和酬黃用泰

思君不見待君吟何許蓬萊聞妙音  
孫綽遂初先作賦蘇秦未遇晚多金  
閒看歸鳥暮雲合欲渡滄江春水深  
惟向層樓窮望眼可能無策剗西岑

和袁寅亮進士見寄

白髮禁春愁奈何當年只合臥煙蘿  
山中老屋歸來早扇外飛塵感慨多  
意薄功名隨夢散交游道誼自心和  
兩君文采真連壁枯槁長懷挹楚波

得月樓為陳與京賦

陳贊  
劉

得月樓前春水寬  
玻璃萬頃接闌干  
光涵銀漢虹橋迴  
影動金波貝闕寒  
綠酒千鍾人上鶴  
紫簫一曲女乘鸞  
遙知貳館還相近  
玉臂清輝好共看

和彭允迪見寄

佳句聞君勝舊時  
珊瑚出海玉交枝  
十年客路迷陳迹  
千里雲山繫所思  
囊罄黃金難得酒  
窓添青竹倦題詩  
近年轉向世情薄  
晴日滄江理釣絲



靜思集卷八

欽定四庫全書

靜思集卷九

元 郭鈺 撰

七言律

辛亥秋詔舉秀才余以耳聾足蹙縣司逼迫非

情因成短句

恭承丹詔網羣材臥病空山百念灰  
晉代徒聞三語掾漢廷何待兩生來  
天闕虎豹應難得雲錦衣裳不易裁  
寂寞西山雙鬢雪獨能永夜望三台

和羅養蒙見寄三首

君歸舊隱得安居  
晝獵南山夜讀書  
雞唱窓間舞長劍  
馬嘶花外駕輕車  
每逢二仲回青眼  
已辨千仙醉白魚  
風致飄飈驚坐客  
相思不見獨踟躇

詞林文物早知名  
對客揮毫思不羣  
梁震每稱前進士  
灞陵誰識舊將軍  
清談竹下霏晴雪  
匡坐松陰管白雲  
見說主翁歡意洽  
酒酣長共夜論文

文章早歲愧盧前  
心死如灰不復然  
魚目混真非易識



驪珠出海事虛傳  
飛鳴何敢分鴉鳳  
枕漱惟應近石泉  
幾度打頭風雨惡  
碧桃紅杏自年年

和黃用泰見別

雙井詞源疏派遠  
諸孫文采邈難攀  
芝蘭晴日庭階外  
花柳春風杖屨間  
白髮往來愁客路  
青山歸去掩柴關  
却怪溪流離恨滿  
寒聲永夜響潺湲

石洞道中

天風蕭蕭吹布袍  
上山下山忘我勞  
江聲忽隨小橋轉

秋色不讓南山高  
荒山師米水為碓  
懸崖取果人如獠  
茅簷老翁迎客笑  
畏途跋涉多賢豪

寄王進士

伏觀前鄉貢進士王禮子諒所刻長留天地間集辱收謬作廁其間心竊

愧焉而誤名為昂因筆寄意二首

車蓋歸來鬢雪深  
將來高興托詞林  
著書谷口雲封屋  
吹笛山陽月滿襟  
千古文章闕氣運  
幾人心力費光陰  
閑來朗誦長留集  
尚想西歸問好音

老去羣書逐夢忘  
青燈白髮夜淒涼  
平時誰信班生策

落日空懷陸氏莊  
天為國家生俊傑  
地居臺閣盛文章  
鄙夫空谷逃名久  
不謂人間有郭昂

寄贈皇厓壇劉鍊師

壇下溪中出  
石白如水晶

神仙宮館近青冥  
紫翠峰巒開畫屏  
日射水晶江石白  
雲封琥珀嶺松青  
虎司丹鼎知留訣  
鶴立瑤臺聽說經  
相約安期今夕至  
靈封遙想滿虛櫺

聞桂林牡丹盛開

臺甃重歸剪棘榛  
穠華自不負芳辰  
共承桂樹九霄露

已見吾家六代人  
膩粉露寒初試曉  
醉紅雲暖欲嬌春  
遙知賓客多懽賞  
誰在題詩筆有神

寄劉因

自從南國息干戈  
江海聞君得意多  
騎馬春迴桃葉渡  
吹簫夜和竹枝歌  
離愁雁信雲千里  
老境漁舟雨一蓑  
大藥無資長臥病  
東溪何日得重過

哀楊和吉

重到西亭泪自垂  
更從何處共襟期  
看花馬上春雲散

種柳門前秋雨悲，仙客已聞遺橘井。故侯猶待館羅池，  
茫茫天壤名長在。賴有灤京百詠詩。

病目寄宋時舉

丁丁伐木最關情，病起秋風畏客程。隔霧看花生眼纈，  
誓天止酒閉愁城。荒村茅屋白烟起，落日楓林紅葉明。  
青壁丹崖長在望，玲峴瘦影獨心驚。

寄李少府

學仙不向吳門去，百丈詩壇主舊盟。白雪寒添巾下滿，

采雲晴繞筆間生香分芸草茅齋小夢入梅花紙帳清  
竹下每聞賓客滿我來何日酒同傾

壬子八月余病日至十月劇甚因掩半驗明則  
右者已盲因自笑戊申歲右耳病聾庚戌右  
脚患軟痛今右目又喪于朝家為半丁不求  
廢而自廢矣強賦短句寫寄中和及仲簡

自從白髮病侵尋涉世方知憂患深吹面塵沙須眯目  
求名文字少灰心舊書盡賣惟留劍好酒能除遽學琴

樗散獨存天所賜從今肆志臥雲林

耒陽郭方中云先世自麻岡分派嘗仕前朝今  
道跡畝畝至徵詩余以同志歌以贈之

老我還山始學耕鋤犁不辨畝縱橫坐分午餉田烏狎  
預卜年登野鳥鳴訓子但求名姓識輸官寧使斗升贏  
聞君亦作歸休計好是吾家舊弟兄

癸丑首正

雨絲寒織暮江煙春酒杯深琥珀鮮盲廢倦題新甲子

醉來謾說舊山川  
貞元朝士今誰在  
東郭先生每自憐  
藥物酒錢償欲報  
惟逋詩債到新年

寄周文瞻主事

天柱峯前松十尋  
聞君結屋最幽深  
釣魚溪動雲生屨  
放鶴風高秋滿林  
薤葉篆從兒學寫  
松花酒待客同斟  
愁余白髮長相憶  
夜雨青燈空苦心

寄宋時舉

解劔贈君意不難  
劔光飛射斗牛間  
文章聲價誰能好



風月襟期君最閒，雲暖鳳和簫管響。雨晴龍護珍珠還，崆峒原是神仙境。萬丈丹梯不可攀。

和荅彭中和

羞澁空囊結客難，何人雙壁立談間。每瞻雲鶴知君到，却羨沙鷗似我閒。攜酒溪山思共往，捲簾風雨又空還。才名能下陳蕃榻，寧許他人得再攀。

暮春過羅伯源次韻

柳絲煙暖繞溪梁，四望園亭盡向陽。雨過半篙新水綠。

風迴兩袖落花香簾通香篆晴光轉窻隱碁聲晝漏長  
公子閒情最瀟洒何時杖屨得徜徉

李竹簡往清江久而不歸因諷以寄

扁舟四月下清江江水魚沈江路長豈是信陵忘魏國  
自緣朱邑愛桐鄉烟中蒼樹官橋晚雨外紅蓮水檻涼  
惆悵諸公頻問信秋風漸次到秋堂

同王志元賦戴存節秋圃堂

君家舊屋我曾到秋圃新堂今始聞種菊編籬乘細雨

攜琴移席候晴雲無錢陶令懷清節衣錦韓公樹大勳  
碑記好邀劉處士細論出處著高文

謹堂賞菊

繞庭種菊色爛斑想見陶家得此難大白開黃原不俗  
淺紅映紫兩相歡微風香動秋容淨清霧叢深曉氣寒  
賴有山翁家釀熟花前子細共君看

和荅坐客

簪花不惜鬢毛斑獨惜花前得意難風雨白衣憐客久

江山彩筆奉君懽蛾眉擁雪玉人暖仙掌擊秋金狄寒  
是處西風著顏色未應長向故園看

春日有懷彭中和李仲簡

老懷久欲謝青春春到惟添白髮新對酒不辭今日醉  
看花却憶去年人自知降漢終歸蜀誰激連衡遠入秦  
遙想思鄉情更苦不應連夜夢君頻

和荅彭中和

長向春山數別期春花次第報君知舟迴剡曲綠何事

劍合延津在幾時  
庭院暖風花氣入  
池塘微雨鳥聲低  
甕頭酒熟邀誰共  
惆悵歸雲獨柱頤

和周子深

積雨空齋傷客心  
曉雲初散暮雲陰  
荼蘼池上香沈水  
杜宇煙中愁滿林  
司馬倦遊勞遠夢  
休文多病廢新吟  
遙知勝地登臨好  
酒量如今幾淺深

贈醫士劉良孟

移家久住大江隈  
種德堂深酒滿杯  
秋雨一林芝草長

春風千樹杏花開  
虎收新谷岩前臥  
龍捧竒方海上來  
嗟我素髭無染法  
若為攜手訪蓬萊

送別陳玉章南遊

文教重看被海湄  
發船撾鼓曉光遲  
黃茅瘴滿飛南雪  
庾嶺梅開到北枝  
海舶得魚頻貫酒  
人家見竹遍題詩  
好懷更約歸來早  
花柳東風二月時

二十六日晴過諶塘

布袍稍覺曉寒輕  
晴色偏饒雙眼明  
山逕黃泥攢虎跡

寺門蒼樹挂猿聲  
重來誰與同心膽  
老去惟思避姓名  
枯柳橋西曾識面  
獨迴青眼遠相迎

哭周子諒員外

士林憔悴泣相逢  
此語緣君意萬重  
蕙帳秋風鳴老鶴  
墨池春水化飛龍  
遙知臺省文章好  
不似山林意味濃  
重到滄江洲上路  
野煙荒草暗行蹤

池上亭

好是君家池上亭  
繞池芳草亂青青  
山童種菊開花逕

水鳥窺魚下柳汀詩句有時吟不盡酒盃連日醉無醒  
綠陰添得黃鸝語六曲銀屏和淚聽

感寓

車馬門前久絕蹤柴關長借白雲封人情翻覆殊無賴  
心事依違遂漸慵恩怨一時彌子馬似真千古葉公龍  
春花總被春風誤老去山中始種松

聞宋竹坡求剪紅羅花

叢叢紅紫錦成窠春色遙憐滿竹坡得酒謾能歌白紵



看花猶愛剪紅羅根分后土冰霜晚潤浥中天雨露多  
好待春回寒谷早遲君花外共長哦

丙辰元日

歲日相逢兩丙辰把盃又屬丙辰人形容老醜鄉隣怪  
居止踈慵魚鳥親竹馬小兒如昨日梅花老屋羨長春  
諸孫催寫桃符板病眼狐瞳得句新

介坡詩為郭彥文賦

北山東下勢陂陀中有高人住介坡池浸暖紅花弄影

窓涵濕翠竹成科心如鐵石偏能賦  
劍倚崆峒祇自歌  
清節百年冰雪苦重逢徐邈問如何

挽清江劉中脩

奮筆清江追二劉奈何垂老入西州  
兒痴竟累張彝死  
母老誰為禹錫謀風雨魂歸金石晚  
江山恨滿玉關秋  
詞林頓爾成憔悴目送飛雲雙泪流

送別歐陽奎訪安龍興兼柬胡湜

明日開帆過豫章交親滿眼總難忘  
舊聞太守尊徐穉

今見諸公說鄭莊雨映紅蓮湖水淨雲連蒼樹楚山長  
省郎若到逢胡湜為覓鄉書寄數行

和素方茂才秋夜宴集

下馬階除問錦幃羅衣花白縷金圍月明湖水龍吟細  
雲度吳山雁到稀楊柳舞低牙板促木犀香滿羽觴飛  
素郎自是風流客舊約秦臺願不違

奉寄歐陽文周

楚楚才華最憶君春山勝事遠相聞折花林動飛紅雨

洗硯池虛散紫雲到處能吟詩滿軸逢誰不說思超羣  
山中舊約應能到定與論文到夜分

聖節

天門曙色曉爐煙宮錦春花簇采旃日月龍章居北極  
雲霄鳳吹奏鈞天獻桃王母顏如玉承露金人骨欲仙  
遙想蓬萊移仗入侍臣應奏白雲篇

靜思集卷九

欽定四庫全書

靜思集卷十

元 郭鈺 撰

五言長律

挽李心原徵士

時清多士奮道屈哲人嗟伊昔敷文治如君實國華衣  
冠傾望族文字擷天葩薊闕驅車遠吳山倚劔斜諸生  
親教授前輩倍籠箴鶚表騰烏府薪歌載鹿車苦心抱  
冰蘖高興托煙霞老景期如蔗中原亂似麻漢官思再

觀周翼去難遮夜怨雲巢鶴寒啼宰樹鴉諸公紛誅筆  
賤子忝通家洒泪桐江上悲風咽暮笳

七言長律

素寅亮讀書深山萬木之中以避暑文瞻為賦  
長句因次韻以寄

獨向陰崖結構牢一時文采擅風騷雲間見客疑猶淺  
山下人行望始高蒼樹窺巢馴鶴鵲翠藤結蔓挂猿猱  
遙知高臥多標致何問長齋代骨毛洗耳未應徒見許

攢眉但恐不容陶山僧進謁多題竹野老相過或獻桃  
綿蕝暫陳存故事棘闈嚴備遠周遭鑿平崑罅安書籍  
掃集松花釀酒醪醉後賦詩題石壁興來送客釣江臯  
蘇門傲晚惟聞嘯康樂登臨豈憚勞餘雨傍松延薜荔  
晚涼疏水灌蒲萄明朝使者求顏闔只此山中不用逃

五言絕句

候吳植不至

相期林下宿呼童掃蒼苔蒼苔看又合美人殊不來

題分宜縣橋

雲從溪北生雨過溪南響  
溪上蓑笠翁倚闌看水長

日午

日午芳園歸欣然問主婦  
甕頭酒如何杏花開滿樹

茅屋

茅屋南山下細雨桃花謝  
清晨起梳頭鄰家作春社

漫興

春寒閉春閣酒醒春衫薄  
春去積春愁杏花雨中落



八月二十四日

鵲聲喧曉庭掃門獨延佇誤喜故人來竹籬墮腐鼠

春日過山家

簾外燕交飛天涯人未歸大兒新上學白紵自裁衣

重到山家

細雨長茶芽東風吹柳花行人今日到先自補窗紗

山翁勸酒

山翁勸我酒共指池上柳昨日東家春今日西家有

題龍旗墨梅

孤標開墨沼勁氣入霜毫謝庭春色好玉樹兩相高  
二月十七夜夢為人作墨蘭

石闌瞰虛碧滿院蘭花開攬衣起結佩匡坐待君來  
吳姬別思

霜月五更殘如何去又還誤簪釵鳳小落在枕屏間  
讀史四首

六國中深機三山使未歸輜輶車上夢受用鮑魚肥

險語迫飛霆將軍驚落箸明朝賣履人淚洒西陵樹  
將軍方跋扈幾人願執鞭啼妝曉相對却為秦宮妍  
恂恂謝玄微侃侃宋竇儀承家與謀國不競真吾師

宿鰲溪

投宿南山中驚魂帶餘怖忽聞鼙鼓聲夜壑松風度

大州曉發

日高啼鳥散江轉斷雲遮向客說殘夢昨宵曾到家

七言絕句

題春江送別圖

君上孤舟妾上樓  
望中煙雨意中愁  
江波若會離情苦  
一夜東風水倒流

八月初三夜對月

蛾眉斜剪銀光薄  
搗碎玄霜不成藥  
瓊樓夜鎖秋沈沈  
一枕天風桂花落

四時詞

春夏秋  
冬四首

暖雲飛撲玉驄歸  
簾捲香風酒力微  
夜坐久憐明月好

細鋪花影繡羅衣

日射嫣紅安石榴  
波涵空翠木蘭舟  
美人調笑渡江去  
半榻柳風暮不收

鶴認琪花欲下遲  
蓬萊仙客遣催詩  
情深寫到相思處  
秋露芙蓉開滿池

疎林晴旭散啼鴉  
高閣朱簾窳地遮  
為問王孫歸也未  
玉梅開到北枝花

訪龍長史不遇

鸚鵡窗深鎖翠寒  
松花不掃紫苔乾  
自將名姓題脩竹  
延桂樓前第五竿

花前

次首  
無題

花前曾共飲離尊  
青鳥西歸減舊恩  
雙陸細敲紅日落  
茶煙隔竹不開門

唾茸殘碧枕屏低  
香散銀篝翠霧迷  
只恐來宵春夢斷  
誤他明月到窗西

題安成戴觀所藏崔徽圖

彩筆經營苦未工  
臘脂洗盡泪痕紅  
鏡中已少真顏色  
何待他年認卷中

和王儀贈別

一曲秦箏春酒濃  
暖雲輕撲翠鬟鬆  
玉驄千里關門曉  
鷓鴣數聲煙樹重

別阮士瞻

豆蔻春梢著小花  
玉人憔悴掩琵琶  
阮郎病起心情減  
半榻松風自煮茶

題紈扇贈馬文學

好風吹雨過橫塘  
百尺芙蓉水檻涼  
封事草成秋滿榻  
坐停紈扇愛花香

水東獨行

獨行山逕桐花落  
忽渡板橋溪水渾  
殘日背人低遠樹  
斷雲裏雨入前村

和宋五見寄

苦辭樽酒不同傾  
流水浮萍復有情  
今日江南望江北



綠陰如雨鶉鳩鳴

尋人不遇

早望雲林意欲傾  
獨回江路鳥空鳴  
山童去後始知悔  
追客橋西問姓名

題扇二首

柳樹晴虹隱畫橋  
藕花微雨過歸橈  
波光倒蘸紅樓影  
照見佳人弄玉簫

茅亭一箇竹編籬  
水鳥數聲風滿池  
吹面荷花微醉醒

雪羅小扇坐題詩

春夜

香霧滿簾風不到  
花陰鋪地月斜明  
春寒策策春宵短  
又聽隣鷄第一聲

題訪戴圖

雪月尊前足笑歌  
到門何事不相過  
情知離合皆天意  
只恐重來白髮多

宜春贈別

微茫烟浪浦帆開一曲琵琶泪滿腮  
江水不如潮水好  
送人東去復西來

辛卯聞徐州警報

塞河詔下選丁男  
明日彭城野戰酣  
愁殺翰林歐學士  
白頭騎馬望江南

題廬陵義士羅明遠傳後

淮海風迴戰血腥  
青原不改舊時青  
中朝將士論功賞  
讓與江南一白丁

題分宜縣樓二首

十一月初八日楚金敗績余被拘於分宜因有此詩冠中

有談劉沔陽之事甚悉且亦以為口實

撲邀官曹論是非不知把釣老漁磯  
沔陽太守文章伯  
賣卜城南竟不歸

獨宿江城夢故園一襟塵土滿啼痕  
老親不想癡兒在  
剪紙應招客路魂

題梁使君太洲營

畫船撾鼓大江中兩岼旌旗獵曉風  
一點鴛鴦雲外落

將軍初試賜來弓

怨別

病起銀屏滿藥塵  
夜窗愁絕月窺人  
寒燈不作雙花喜  
羅帕啼痕點點勻

獨行山中

七步潛行五步迴  
路通溪曲滿蒿萊  
青袍白馬誰家子  
又向松陰唱道來

宿桐江野人家

松明火盡掩柴扃  
月影踈踈透短檠  
一枕秋風涼夜好  
可憐獨向客中聽

城望

鼓角城頭落照懸  
客愁愁似五年前  
遙憐小弟攜家遠  
一點飛雲望眼穿

發家信

寒硯敲冰帶淚磨  
故園消息近如何  
老妻不信愁深淺  
歸日應憐白髮多

二月十三日

花陰轉午鵲聲喧  
忽憶庭闈捧壽尊  
亂後附書曾到否  
也應賒酒共溫存

春夜

路入故園知幾程  
小樓簾捲月斜明  
夢中不記遭兵火  
猶在海棠花下行

青梅詞

青青梅子故園春  
嚼破微酸帶淺顰  
誰信梢頭如豆小

意中消息久懷仁

章臺怨

柳繞章臺萬縷金  
春風送別最傷心  
如今莫問長條盡  
并與章臺無處尋

清明日過羅伯剛別業

梨花滿院讀書聲  
竹馬兒童自送迎  
共說東風吹雨散  
山翁今日作清明

訪羅仁達不遇留題樓壁二首



一逕松風導入山老懷  
願托白雲閒白雲飛去他山宿  
日暮雨來愁倚闌

翠壓山樓積雨餘  
花間酒暖煮溪魚  
提壺勸酒且須飲  
頭白如今少著書

和宋五別後見寄

誤將鸚鵡教詩成  
每到人來喚姓名  
從此西園踪跡少  
萬絲煙柳鎖春晴

寄贈龍興諸寓公四首

舊著羣書費苦尋  
雲山回首負初心  
歸舟重到臨江驛  
玉筍山前芳草深

抽毫史館會鳴珂  
老去光陰又幾何  
蘇武不緣持節苦  
胡姬嘯子媿人多

孺子祠前湖水東  
幾回清夜夢吳公  
白雲何事他山去  
不管長封紫極宮

落日凭樓滿眼愁  
征帆無數下江州  
憑誰為訪淵明宅  
細采秋英薦李侯

二月十七日有感

花匝疎篁水遶門幾回扶月醉西園青燈昨夜挑殘雨  
空認春衫補舊痕

偶興

高柳著花懸紫煙歸舟離恨滿晴川六年杜牧傷遲暮  
况復如今二十年

清晝

雀翻翠篠接飛蟲雨定游絲褪落紅漸老心情添嬾慢

題詩多在綠陰中

感春二絕時館人在獄

萋萋芳草舊亭臺  
燕子銜愁逐處來  
春酒甕頭今日熟  
桃花一樹雨中開

干謁傷懷去路窮  
鯨飛蛟舞楚江風  
家書寫到平安字  
始信吾師塞上翁

涼夜

竹外涼風留晚坐  
驚斷蛩聲山葉墮  
天河何處是雙星

新月織織碧雲破

重題石洞

不筭歸程筭去程  
茫茫世事自傷情  
小樓昨夜不成寐  
飽聽松風與水聲

同周雪江題劉氏貞女詩卷

百年節義仗賢豪  
一死翻憐女子高  
不敢長歌題卷上  
轉喉恐犯舊官曹

洞口人家

松樹迴環四五家  
機梭長日響咿啞  
西風裏得臙脂色  
偏與籬東木槿花

和周子諒見寄二首

白露斜飛秋滿堂  
微寒先結鬢邊霜  
可憐枯折山園竹  
猶自虛心待鳳凰

江上晴波動碧虛  
柳汀花塢抱村居  
男兒不佩黃金印  
罷釣歸來只讀書

秋浦晚歸

芙蓉開後涉波頻  
落日迴舟獨愴神  
鷗鳥幾回相見熟  
故穿菱葉避歸人

對月寄友人

相逢是處月嬋娟  
願托襟期共百年  
諳盡人間離別苦  
始知月白不長圓

重經旅館

交情如漆總難憑  
往事尋思白髮增  
門掩蟪蛄塵滿壁  
向來曾頓讀書燈

小樓

夢飛不到越溪頭  
空想鴛鴦戲彩舟  
昨夜小樓清似水  
雨聲添足十分愁

春暮飲田家

牡丹芍藥委蒼苔  
風挾餘香去復來  
二十四番都過盡  
一樽獨對菜花開

四月十五夜對月感舊

早年蹤跡水萍浮  
垂老飄流未得休  
今夕人情今夕酒



舊時月色舊時愁

妾薄命

孤鸞窺鏡剪情緣  
泪血沾襟十五年  
誰信舊時歌舞伴  
相逢猶自妬嬋娟

四月十五日江上獨行因思去兩年憂患之日

感恨次舊韻

投石滄浪竟不浮  
雲林自合早歸休  
漁舟點點前江去  
載盡斜陽不載愁

六月二十九日觀雨

青山山下是吾廬六月邱園草盡枯  
憑仗西風吹雨去  
官田今歲又添租

題墨菊

老圃風霜許見親  
綠誰盡改舊精神  
淵明不為陳玄在  
怨殺元規扇外塵

收邊季德書

門外蓬蒿一丈餘  
病貧無怪故人疎  
午窗獨領松風坐

細讀邊郎寄遠書

醉後重題西雲亭

剪茅蓋屋竹編籬  
淺白深黃萬菊枝  
雲氣不煩將雨至  
西雲老子正題詩

題卞與善梅花圖

騎驢灞橋烏帽側  
千里相思玉堂客  
夜窗酒醒月窺人  
一掬精神炯如雪

題王楚善梅二首

百年孤榦長苔衣數點寒花映竹扉昨夜東風消息到  
主人扶醉月中歸

江雲欲雪角聲哀冷蕊商量開未開記得玉堂揮采筆  
萬花晴昊照深杯

題龍旗梅

硯冰敲碎碧雲殘蜂蝶無飛花意閒記得共尋林處士  
嫩寒清曉到孤山

桃花塢

蝶飛蜂遠野桃花香散墻西賣酒家  
漁棹誤隨流水遠  
一庭紅雨夕陽斜

題鄒自春石屏巫山圖

一片屏間十二峰  
陽臺去路有無中  
半窗香霧籠寒玉  
猶似行雲到楚宮

和金守正題墨蒲圖

馬乳垂垂白露溥  
瘦藤斜舞月光寒  
涼州萬斛尋常醉  
回首西風紙上看

題鍾道

老臣骨朽戀君王  
白眼孤瞳虛耗忙  
不惜錦綉兒睡暖  
誰人更問繡香囊

晚秋過丁勗

竹外涓涓流水長  
讀書聲歇閉山房  
西園蜂蝶東園去  
黃菊數枝高出墻

題羅秀賓瑞粟圖

粟分五穗效禎祥  
不敢移根獻廟堂  
聖主得賢為上瑞

畫圖聊付子孫藏

壬子正月雪中自從姪九畹家歸

擔登山路挾餘醒  
急霰琮琤遠送迎  
絕勝泛舟湖上月  
琵琶一曲襍秦箏

春日

花氣熏晴春晝長  
一池水影舞迴廊  
好風賺得松醪熟  
開遍數枝山海棠

寄鄒自春

樓間美酒滿銀壺樓外好山開畫圖上學郎君書早讀  
丁寧汲水灌菖蒲

閏十一月朔日山路見梅

蓓蕾微傳春信真幾迴夢想玉精神不知月落參橫處  
猶有孤眠惆悵人

乙巳年余避地彭老家還再過之倏爾十年而  
人改物換可感者多矣因賦

舊題塵暗小樓間花鳥庭空白日閒鳥自不鳴花自落



客愁何得不相關

贈別

醉挽征衫折柳枝  
柳花飛處不勝悲  
東風過後西風起  
待得青條又幾時

閨怨

妝臺塵暗鎖愁眉  
瘦倚東風似柳枝  
又恐侍兒催問藥  
只言蠶早葉歸遲

春夜飲

蠟光紅射酒盃霞夜久窗虛月透紗詩筆醉拈如有助  
暖風吹動瑞香花

道逢陳玉章

山色川光作雨晴花陰滿地嘒黃鶯去年酒伴今何在  
邂逅陳郎笑獨行

江望

盡把離愁種驛亭春風吹入草青青傷心為問行舟客  
東過清江停不停

三月初五日偶題

嬌鳥籠中晒綠衣  
雄鳴高樹不思歸  
去年寒食今年夢  
曾向西樓共學飛

山家少憩

松下蒼苔掃復生  
籠中嬌鳥寂無聲  
東風幾度傳花信  
偏遇春陰不遇晴

題李次晦鄒瘍醫詩卷

颯颯秋風落葉深  
輓轡寒飈帶哀音  
李侯瘡癰君能療

老我柴門獨捧心

春日憶蕭韶二首

雲歸長宿北山頭  
誤逐東風過小樓  
帶得舊時蕉葉雨  
數聲敲碎客中愁

飛飛燕子楚天涯  
華屋春穠不似家  
遙想日長吟思苦  
獨看紅杏落殘花

寄遠

萬點飛花風外過  
紅埋泥土白隨波  
閒愁散與傷春客

君在江南想獨多

感事二首

雨過汀沙失舊痕  
春寒鸚鵡悶無言  
楊花春水成萍葉  
踪跡猶難到故園

依稀舊館綠楊舟  
不見羣鷗見水流  
白髮青燈孤負盡  
至今猶自替人愁

上巳日與周公明經蕭韶讀書處

四海交遊老盡非  
如君年少又相違  
申明亭下煙花暝

惟有泉流送客歸

春日過山家題羅帕

冰絲縷縷繫深恩  
青鳥飛來每斷魂  
留得薔薇香易滅  
只從燈下認啼痕

無題

遊絲風暖颭飛花  
窈窕簫聲隔采霞  
畢竟神仙難換骨  
自分丹火煮胡麻

有感寄宋五二首

春夜清濃夢覺空爛柯不省遇仙童人間翻手思成怨  
無怪襄王憶夢中

畫樓煙暖杏花晴羅綺春嬌按玉笙水調未成翻越調  
枉勞書信問鶯鶯

和蕭伯章春夜倚樓

雲度松梢月半陰懸崖倒挂白猿吟倚樓數遍傷心事  
風雨故園春草深

寄歐陽文周

金分  
卷十  
芳草春煙鎖故廬  
泊舟南浦近何如  
客囊共訴黃金盡  
欲問平安但寄書

題石壁

石壁題詩剗翠苔  
感時傷別壯心摧  
沈園記得前生到  
酒散花陰月滿臺

六言絕句

題掀蓬圖

疎蕊淡籠斜月橫  
梢低照寒流清意  
是誰領略除非訪



戴王猷

候吳植立不至

捲簾春睡初足上馬午陰半斜人別斷煙疎柳烏啼殘  
雨落花

詞

摸魚兒

和彭中和  
雙頭菊

墜秋香並肩如舞情緣天似相許結根自是孤高者何  
乃含嬌凝竚似秦女乘鸞仙袂凌風舉精神清楚便帶


縮重金環連疊勝心事自相語  
情深處此事人間最  
苦多少蝶來蜂去蘋婆莖命同生死尚恐翻雲覆雨休  
折與算太液芙蓉不到人間覩傷今懷古想墻裏笑聲  
池西流水紅葉漫題句

銘

席門銘

剪秭編茅高揭為門獨當一面出入道存雖樞機之不  
密而經緯之有倫雖闔闢之不時而卷舒之由人隔風

埃其晝靜敵冰雪而春溫吾常啟甕牖敞蓬軒擊土鼓  
斟窪樽對老親而起舞披百結之懸鶉亦不知玉堂之  
為貴繡闥之足云也百年逆旅睥睨乾坤忽長者之過  
我遂一笑而忘言



靜思集卷十